

आकाशवाणी

पैहले खास-खास खबरां:-

1. असम-केरलम ते केन्द्र शासत प्रदेश पुदुचेरी च विधान सभा चुनां लेई मतदान शुरु होई चुके दा ऐ। मतदान पूरी चाल्ली रमानदारी ते बवस्था आहले ढंगै सिर तोढ चाढ़ने लेई सुरक्षा सनें लोड़चदे सब्बै बंदोबस्त कीते गेदे न।
2. सरकार नै घरेलू ब्हाई सेवा कम्पनिं लेई राहत दे तौरा पर लैंडिंग ते पार्किंग शुल्क च 25 फीसदी दी कटोती दा ऐलान कीता ऐ।
3. विश्व बैंक नै मजबूत घरेलू मंग ते मुक्त बपार समझौते कारण मजूदा माली बरे लेई भारत दी विकास दर दा अंदाजा 6 इशारिया 6 प्रतिशत रौहने दी मेद दस्सी ऐ।
4. अंतराश्ट्रीय ऊर्जा एजेंसी IEA नै भारत दे प्रोटोटाइप फास्ट ब्रीडर रिएक्टर दे क्रिटीकैलिटी हासल करने दी उपलब्धि दी सराहना कीती ऐ ते इसी भारत दी सिविल परमाणु यात्रा च इक महत्वपूर्ण गेंह करार दिता ऐ।
5. अमरीकी राश्ट्रपति डोनाल्ड ट्रम्प होर पच्छिम एशिया क्षेत्र च केई हफते दे संघर्ष गी खलन करने दे उद्देश्य कन्ने ईरान कन्ने गल्लबात गितै उपराश्ट्रपति J.D. Vens हुंदे कन्ने नेतृत्व च इक प्रतिनिधिमंडल गी इस्लामाबाद भेजा करदे न।
6. IPL च अज्ज लखनऊ सुपर जायंटस दा मकाबला कोलकाता नाइट राइडर्स कन्ने होग- कल गुजरात टाईटन्स नै दिल्ली कैपिटल्स गी इक रन्ज कन्ने हराया।
7. सीनियर एशियाई कुश्ती चैम्पियनशिप च भारत नै अजे धोड़ी 2 चांदी ते 3 कैह दे तगमे जिते न।

Assembly Polling

असम-केरलम ते केन्द्र शासत प्रदेश पुदुचेरी च विधानसभा चुनां लेई वोट पाने दा कम्म शुरु होई चुके दा ऐ। असम दिये सब्बने 126 केरल दिएं 140 ते पुदुचेरी दिएं 30 सीटें पर इक्के गेड़ च मतदान होआ करदे ऐ। सख्त सुरक्षा बंदोबस्त हेठ वोट पाने दा कम्म बड्डलै 7 बजे शुरु होई गेआ ऐ ते चुनां गी पूरी चाली सुतंत्र- निष्पक्ख ते रमानदारी आहले ढंगे सिर करोआने लेई सुरक्षा सने लोडचदे होर सब्बै बंदोबस्त कीते गेदे न। केरलम दिएं 140 विधान सभा सीटें लेई कुल 883 मेदवार चुनां मैदान च न। राज्य च 2 करोड़ 71 लक्ख मतदाता न। पुदुचेरी च विधानसभा चुना लेई 204 मेदवार मतदान च जिंदे लेई इक जहार 99 मतदान केन्द्र बनाए गेदे न ते मतदान लेई कुल 31 जहार 490 मतदान केन्द्र बनाए गेदे न।

<><><><><><>

Govt. -Airlines

केन्द्रीय नागरिक उड्डयन मंत्री राम मोहन नायडू होंरें घरेलू विमानन कम्पनिएं आस्तै राहत उपाएं दी घोषणा कीती ऐ। एदे तैहत लैंडिंग ते पार्किंग शुल्क च 25 फीसद दी कटौती कीती गेई ऐ। एह कटौती फौरी प्रभाव कन्नै लागू होई गेई ऐ ते 3 म्हीने तगर प्रभावी रहौंग। इस गेंस दा मकसद भारतीय एयरलाईस पर बद्दे परिचालन खर्च दे दबा गी घट्ट करना ते वैश्विक ईंधन कीमते च बाद्दे दे बावजूद यात्रिं आस्तै हवाई यात्रा गी किफायती बनाई रखना ऐ।

<><><><><><>

World Bank-Ind Growth

विश्व बैंक नै मजबूत घरेलू मंग ते मुक्त बपार समझौते दे कारण मजूदा माली बरे लेई भारत दी विकास दर दा अंदाजा 6 इशारियां 3 प्रतिशत कोला बधियै 6 इशारिया 6 प्रतिशत रौहने दी मेद दस्सी ऐ। विश्व बैंक नै मेद प्रगट कीती ऐ जि दक्खन एशिया च भारत विकास दा प्रमुख इंजन बने दा रौहग। निग्गर घरेलू मंग ते निर्यात लचीलेपन दे कारण भारत च विकास दर 2025 आहले माली बरे दे 7 इशारिया इक प्रतिशत कोला बधियै 2026 च 7 इशारिया 6 प्रतिशत होई जाने दा बी अनुमान लाया ऐ। रपोर्ट च आखेआ गया ऐ कि 2027 दी पैहली छमाही च उपभोक्ता मामले गी समर्थन देने लेई GST दियां दरां जारी रौहनियां लोड़चदियां। विश्व बैंक समूह नै त्रंऊ म्हीने दी अपनी क्षेत्रीय रपोर्ट च आखेआ कि विकास दियां संभावना मुख्तौरा पर भारत दे प्रदर्शन सवा प्रेरत न।

<><><><><><>

IEA

पेरिस स्थित अंतराष्ट्रीय ऊर्जा एजेंसी IEA नै भारत दे प्रोटोटाइप फास्ट ब्रीडर रिएक्टर दे क्रिटिकैलिटी हासल करने दी उपलब्धि दी सराहना कीती ऐ। एजेंसी नै इसी भारत दी नागरिक परमाणु यात्रा च इक महत्वपूर्ण गैह करार दिता ते आखेआ कि एह रिएक्टर घट्ट परमाणु ईंधन दा इस्तमाल करोग ते बंद ईंधन चक्र जिसी क्लोज्ड फ्यूल साइकल आखदे न- दी बक्खी बत पदरी करोग। एजेंसी दे प्रमुख राफेल मारियानो ग्रांसी होरें बी इस प्रगति दी सराहना करदे होई प्रधानमंत्री नरेन्द्र मोदी होरें गी बधाई

दिती ऐ। इस रिएक्टर दी खास गल्ल एह ऐ कि एह जिन्ना ईधन खर्च करदा ऐ ओहदे कोला मती मात्रा च ईधन त्यार करने दी छमता रखदा ऐ।

<><><><><><>

Puri –Rehman

केन्द्रीय पेट्रोलियम ते कुदरती गैस मंत्री हरदीप सिंह पुरी होरें बांगलादेश दे विदेशमंत्री खलीलुर रहमान कन्नै मलाटी कीती ते दौनें मुख्यें बश्कार ऊर्जा सरबंधें गी मज़बूत करने पर चर्चा कीती। एदे थवां पैहले रहमान होरें विदेशमंत्री डाक्टर एस. जयशंकर हुंदे कन्नै उच्च स्तरीय गल्लबात कीती। सोशल मीडिया दी इक पोस्ट च पुरी होरें राजधानी च होई दी बैठक च बांगलादेशी प्रतिनिधिमंडल दी उच्च स्तरीय हिस्सेदारी दा जिक्र कीता। पुरी हुंदे कन्नै होई दी बैठक च दौनें गोआंडी मुख्ये बश्कार रणनीतिक सरबंधे गी मज़बूत करने पर जोर दिता गेआ।

<><><><><><>

West Asia

अमरीकी राष्ट्रपति डोनाल्ड ट्रम्प होरें पच्छिम एशिया क्षेत्र च केई हफते दे संघर्ष गी खत्म करने दे उद्देश्य कन्नै ईरान कन्नै सिद्दे परतक्ख गल्लबात करने लेई उपराष्ट्रपति J.D. Vens हुंदे नेतृत्व च इक प्रतिनिधिमंडल ते होरनें बड्डे अधिकारियें गी इस्लामाबाद भेजा करदे न। व्हाइट हाउस दी प्रैस सचिव कैरोलिन लेबिट होरें आखेआ ऐ कि गल्लबात करने आहली टीम च पच्छिम एशिया दे विशेष दूत स्टीव विटकाँफ ते राष्ट्रपति ट्रम्प हुंदे जोआई जेरेड कुशनर शामिल न। पैहले गेड़ दी गल्लबात शनिवार बड्डलै होग। ईरान दे राष्ट्रपति मसूद पेज़ेशिक्यन नै इस गल्लै दी तस्दीक कीती ऐ कि

पाकिस्तान दे प्रधानमंत्री शहबाज शरीफ हुंदे कन्नै टैलिफोन पर गल्लबात दे बाद तेहरान इस्लामाबाद वार्चा च शामिल होग।

<><><><><><>

US- Hormuz

अमरीका नै आखेआ ऐ जे युद्धविराम दे तैहत होर्मुज जल डमरु मध्य दे रस्ते वाणिज्यिक ज्हाजें दी आवा-जाई परतिए शुरु होने आहली ऐ। इस दौरान राष्ट्रपति डोनाल्ड ट्रम्प होरें ईरान गी सैन्य हथियार दी आपूर्ति करोआने आहले मुल्खें पर 50 फीसद शुल्क लाने दी चेतावनी दिती ऐ। एह शुल्क फौरी प्रभाव कन्नै लागू होग। ट्रम्प होरें दावा कीता ऐ जे ईरान इक समझौते दे तैहत अपने यूरेनियम संवर्धन कार्यक्रम गी रोकने पर सहमत होई गेआ ऐ।

<><><><><><>

EAM -Iran

विदेश मंत्रालय नै ईरान च मौजूदा भारतीय नागरिकें गी भारतीय दूतावास कन्नै तालमेल ते अधिकारिएं आस्सेआ दस्से गेदे रस्ते दा इस्तेमाल करदे होई तौले गै ईरान छोड़ने दी सलाह दिती ऐ। मंत्रालय नै आखेआ ऐ जे दूतावास कन्नै सलाह-मशवरा ते तालमेल बनाए वगैर कुसै बी अंतराष्ट्रीय बन्ने कश लोकें गी नैई जाना लोड़चदा ते नां गै ओह इय्या करने दा जत्न करन। कन्नै गै उन्दे थवां अधिकारिएं आस्सेआ दिती जाने आहली ताजा तरीन जानकारी ते परामर्श पर बी नजर रक्खने लेई आग्रह कीता गेआ ऐ।

<><><><><><>

EAM- Mauritius Visit

विदेशमंत्री डाक्टर एस. जयशंकर होर अज्जै थमां मॉरीशस ते संयुक्त अरब अमीरात दे दौरे पर रौहगंन। दौरे दे पैहले चरणे च डाक्टर जयशंकर मॉरीशस च 9में हिंद महासागर सम्मेलन च हिस्सा लैगंन। इस दौरान ओ मॉरीशस दे बड्डे नेताएं कन्नै मलाटी करगंन ते दपकखी सरबंधें दे सब्बनें पैहलुएं दी समीक्षा करगंन। डाक्टर जयशंकर सम्मेलन च हिस्सा लै' करदे होरनें मिम्बर मुखें दे प्रतिनिधिएं कन्नै बी मलाटी करगंन। यात्रा दे दुए गेड़ च विदेशमंत्री होर 11 ते 12 तरीक गी संयुक्त अरब अमीरात दे दौरे पर होगंन।

<><><><><><>

IPL

ते हून IPL

IPL दे कल दिल्ली दे अरुण जेटली स्टेडियम च खेड्डे गेदे इक शानदार मकाबले च गुजरात टाइटन्स नै दिल्ली कैपिटल्स गी इक रन्ज कन्नै रहाई दिता। जित लेई लोडचदे 210 रन्ज दे लक्ष दा पिच्छा करेद होई दिल्ली कैपिटल्स दी टीम 8 विकटें दे नुकसान पर 209 रन्ज गै बनाई सकी ते के.एल. राहुल दे 92 रन्ज दा योगदान कुसै कम्म नैई आया। अज्ज शामी साड्डे 7 बजे कोलकाता दे ईडन गार्डन्स च लखनऊ सुपर जायंटस दा मकाबला कोलकाता नाइट राइडर्स कन्नै होग।

<><><><><><>

Wrestling

किर्गिस्तान दे बेशकेक च आयोजित सीनियर एशियाई कुश्ती चैम्पियनशिप च भारतीय ग्रीको रोमन पल्लोयान नितेश सिवाच नै चांदी दा तमगा हासल कीता- जिसलै कि प्रिंस ते सचिन सहरावत गी कैह दे तगमे नै संदोख करना पेया। नितेश सिवाच नै 98 किलोग्राम- सचिन सहरावत नै 67 किलोग्राम ते प्रिंस नै 82 किलोग्राम वर्ग च तगमा हासल कीता। इनें तमगे दे कन्नै गै प्रतियोगिता दे त्रीए रोज भारत दे कुल तगमे दी गिनतरी 5 होई गई- जिंदे च 2 चांदी दे ते 3 कैह दे तमगे शामिल न।

<><><><><><>